

Plenchi

Bèl a bati

Tring tring, hala bola pa nos por bati bleki poko. Pero aki ta bleki positivo so tin pa zona. Nos skolnan ta preparando pa sera aña kalendario. Preparando tambe pa nasementu di nos niño Hesus. Skolnan ta dòrna pa trese e ambiente dushi navideño. Aktividadnan ta plania pa huntu e famia di skol sera e temporada aki reuní den amor i fé. Korda riba tur esnan di menos rekursu ora bo ta festehá. SI por hasi bo selebrashon menos luho i sin ambundansia pa asina otro por haña algu serka bo pa nan por kome. Korda riba tur esnan den Mgr. Verriet, esnan na hospital. Tur ku ta den internat of den kas nan di kuido pa grandinan. Wak mas leu ku den bo sirkulo será so. Wak mas leu ku bo hanchi di kas of bario. Reach out ! No lubidá ku bo ta úniko, pero bo no ta bo so. Meskos tambe tur otro persona ta úniko.

Not'è riba bòrchi

Pensamentu:

E promé 12 lunanan di bida di nos yu, nos ta pasa ta siñé kon kana i papia. Ora e por kana i papia hopi bon, nos ta pasa e restu di su enfansia ta eksiguí di dje pa e sinta.... i keda ketu.

Riba roster

Un grupo di dosente di RK a bini huntu pa deliberá riba e plan di maneho nobo pa direktiva di skolnan katoliko.

Nan a duna nan kontribushon den formulashon di resultadonan ku nan lo ke mira pa kada un di e metanan prinsipal formulá den e plan di maneho.

Un danki na kada un di nan pa nan kontribushon.



Dosentenan deliberando riba plan di maneho.



Dosentenan deliberando kua resultado nan ke mira na 2020



Den agènda

- **Fakansi**
21 desèmber 2015 pa 3 yauari 2016

Mi ta konta

Un karta pa Papa Noel, di Mama

Apresiabel Santa,

Henter aña mi a trata di ta un bon mama. Mi a kushiná, soru pa mi 3 yunan ku hopi amor i pasenshi (mayoria biaha). Mi a bai dokter ku nan mas ku 6x total e aña aki. Ma yuda na skol pa rekoudá fondo pa pone fan den tur klas.

Pa mi skibi e karta aki a dura basta ora. Mi a hasie entre laba paña, kologá nan I kushiná mi kasa su kuminda preferí, papaya stobá. Mi no tin masha tempu liber awor ku e muchanan tin 1,3 ku 5 aña. Mi ta kere ta te ora nan tin 18 aña mi lo por tin tempu pa mi mes.

Mi tin e siguiente deseonan pa regalo:

Un par di pia mas pa mi pork ore tras di mi Shaida di 1 aña, mientras mi ta baña i bisti Sander I Sergio.

Tambe 2 brasa fuerte pa por kara Shaida saka for di e rey di kos di hunga den supermarket, kada bes ku mi deskuidá i e sali kore bai einan.

Mi ke un outo ku ta laba di su mes, kita tur marka di dede. Tur e holo despues ku nan ahorá of shusha nan karson. Un par di minut pa dia pa mi por sinta ketu maske ta 10 minut. Sin tende “mami” of sin tin ku kore pa stòp Sander I Sergio di bringa pa e remote di televishon. Mi ke bo kita un par di kilo ku mi tin di mas pa asina mi pañanan por sirbimi atrobe.

Un grabadora ku ta papia e mesun frase algun biaha pa dia, sip or kambiando stem kada bes. Paso mi ta kere ku nan ya no ta tende mi stèm mas. E grabadora mester bisa: “Stòp di bringa awor. Bin baña. Ban drumi. Stòp di yora pornada òf bai den bo kamber te ora bo stòp.”

Si tur loke ma pidi ariba no por. Mi por haña maske ta suficiente tempu pa skeiru mi djente i peña mi kabei tambe riba un mainta. Tambe si ta posibel pa mi kome mi kuminda promé e bira hopi friu.

Si no ta muchu pidi, Papa Noel por deklará Ketchup un berdura. Esaki por yuda kalma mi konsenshi.

Bo por regalá mi yunan e boluntat di ‘ruim op’ nan kosnan di hunga sin protestá di niun manera. Please no laga Shaida mustra asina cute ora e hala stul pone na kashi kushina pa e subi i kue chukulati.

Papa Noel, mi tin ku bai paso e mashin a stop di laba, anto Sergio tin basta ratu ta grita pa mi bin wak Sander.

Ayo Papa Noel.. Mama

P.S. Un kos mas...si bo no por dunami tur loke mi a pidi anteriormente. Por favor djis tene mi yunan seif i tene nan yòn pa sigui kere den Papa Noel.

Mucha djispou

Beatrix a studia na merka i aki el a djoin e grupo ku ta protestá kontra abuso i matamentu di bestia pa usa nan pa traha produkto.

Ora el a bin Korsou bèk el a mira ku su mama tabatin un tas di kueru di tiger.

E no por a keda ketu i a remarká: “Mama, hopi sufrimentu di bestia tabatin pa bo por yega na un tas asina.”

E mama a kontestá rabiá: “Beatrix, Hesus bo ta malagradesidó.

Despues ku bo a studia i logra bo titulo bo ta bin bèk bin papia asina aki den? Ku ki derecho bo ta tribi yama bo tata, un bestia. Esaki hamas mi a spera di bo despues ku el a hasi tantu sakrifisio pa bo por logra bo meta”